

BEMANONGA, ANALAIVA, ANKILIVALO, MAHABO

Faly tena faly ny olona nihaona tamin'ny filoha Ravalomanana



Ny filoha Marc Ravalomanana tany amin'ny faritra Menabe omaly.

A ny amin'ny faritra Menabe amin' izao fotoana ny filoha nasionalin'ny antoko TIM, sady filoha nasionalin'ny rodoben'ny mpanohitra RMDM Marc Ravalomanana. Toerana maromaro no notsidihany omaly, ny tany Bemanonga sy Analaiva, samy ao amin'ny distrikan'i Morondava, ary ny tany Ankilivalo sy Mahabo, samy any amin'ny distrikan'i Mahabo. Tamin'ireo toerana izay nolalovany, tsy nanaiky ireo olona raha tsy nijanona nitafa tamin'izy ireo izy, faly

tena faly ireo mponina nitafa sy nihaona mivantana tamin'ny filoha Marc Ravalomanana. Any Morondava anio no hanatanterahana ny kongresim-paritry ny antoko TIM any amin'ny faritra Menabe. Nanomana izany niaraka tamin'ireo mpitarika ny antoko tany an-toerana koa omaly ny filoha Marc Ravalomanana. Tao Bemanonga, tsy namelan'ireo mpoina izy, raha tsy niresaka sy nihaino ny fitarainan'izy ireo. Tao Morondava afak' omaly, nitafa sy nihaino ny fitarainan'ireo

mpanarato, tao amoron-dranomasin'i Morondava ny filoha nasionalin'ny antoko TIM. Nifampidinika tamin'ireo mpitarika ny antoko TIM any Morondava faritra Menabe ihany koa izy, mikasika ny resaka lisitry ny mpifidy, sy ny raharaha manokana momba ny TIM any amin'ny faritra Menabe. Tamin'ireo toerana rehetra nolalovany, nanentana ny reheatra hisoratra anarana amin'ny lisi-pifidianana izy, ho an'ireo mbola tsy nahavita izany. Ny ffidiana hoy i Dada no hahafahana manilika izao fitondrana mpampijaly vahoaka izao. Miara-dia aminy any antoerana ny avy amin'ny birao politikan'ny antoko, ahitana ny sekretera jeneraly Rina Randriamasinoro, sy ny mpanandrindra nasionalin'ny TIM Jean Claude Rakotonirina, any koa ny depiote isany Fetra Ralambozafimbololona, Mamy Rabenirina, Emilien Ramboasalama ary ny depiote Rastany.

Isambilo

Distrikan'Ambanja

68,62% eo ny fisoratana anarana amin'ny lisi-pifidianana

Nampahafantarina tany Ambanja faritra Diana ihany koa tamin'ity herinandro ity, ny famaranana vonjimaika ny lisi-pifidianana. Tonga nanatrika izany ny avy amin'ny antoko TIM sy ny antoko MMM any an-toerana ary ireo avy amin'ny fiarahamonim-pirenena. 83.849 ireo mpifidy voasoratra anarana tao anivon'ny distrikan'Ambanja izay manome tahany isan-jato: 68,62%. Mbola mitohy araka izany ny fanentanana atao amin'ireo olom-pirenena, hijery sy hanitsy ny anarany ao anaty lisitry ny mpifidy, ary hisoratra anarana any amin'ny birao-pokontany mandra-



Ny famaranana vonjy maika ny lisitry ny mpifidy tany Ambanja.

pahatongan'ny 31 mey ho avy izao, raha ny 12 jona kosa ny famaranana ofisialy izany lisitry ny mpi-

LW

Depiote vehivavy niteniteny foana

Aza amporsihana hifanavakavaka ny olona hoy Mamy Gotso

Manoloana ny lahateny nataon'ny depiote vehivavy iray tany Sambava ny alakamisy teo, nivoaka tamin'ny fahanginana ny mpanakanto Mamy Gotso: aza amporsihana hifanavakavaka ny olona hoy izy:"azafady Ranabavy ! Aza mba atosika hanao lohamboto amim-behivavy izahay, aza terena hanota fady vehivavy ihany koa, hajaina ny vehivavy rehefa mahay manaja ny hasin'ny maha reny, sy anabavy sy vady azy. Fa na ny mpivarotena aza mbola hajainay sy arovanay, satria manaja tena sy manaja anay. Aza atosikao hifanavakavaka izahay ary aza atosika any amin'ny fifankahalana ny samy malagasy mpiray tanindrazana izahay." Maro tokoa no tohina tamin'ny kabary nataon'ny depioten'ny IRD, Jocelyne Maxime tany Sambava iny, tsy vitsy ireo mitaky ny hanasaziana ity olom-boafidy ity.

Isambilo



Ny mpanakanto Mamy Gotso.

Ny Valosoa sy fakafaka

Sarotra ny fiainana Mivelona amin'ny sitrany ahay ny Malagasy

Tena sarotra ny fiainana eto amintsika amin'izao fotoana, noho izay antony izay, mivelona amin'ny sitrany ahay ny ankamaroan'ny Malagasy.

Hita sy tsapa amin'izao fitondrana Rajoelina izay fitondrana FENITRA diso lalana izao, fa midangana tokoa ny fanararaotana, mivelona amin'ny "SITRANY AHAY" avokoa ny ankamaroan'ny maro eto amin'ny firenena. Ny fikaroham-bola izay atao hoy ireo izay nanipy hevitra, dia mifantoka amin'ny sitrany ahay hatrany, noho izao fisondrotan'ny fiainana izao, izany hoe na ny mpivarotra na ny mpanjifa dia samy mikafiry vola avokoa, ka ny andaniny raha mivarotra dia voatery manondrotra ny vidin'entana ho lafobe tokoa, satria hono mbola handoa vola eny amin'ny Jirama, ny hofan-trano, ny zava-pihinana, ny fitaterana sy ny anjaran'ireo zanaka, ka voatery manondrotra ny vidin'entana mba ho sitrany ahay... Ireo mpanjifa koa raha miantseha dia miady varotra be na mividy izay kely azo fotsiny ihany, satria toy ny rano ny fivoahan'ny vola, ka tsy ampy raha tsy manao kahiritra hatrany, mibanjina ny sitrany ahay koa.

Ny vidin-javatra ilaina isan'andro dia nisondrotra lafobe avokoa amin'ny ankapobeny, ka rehefa mikarakara ny ao an-tokantrano, dia ny sitrany ahay hatrany no mibahana ao an-tsaina, ka na ny sirandaoka aza dia lasa zara fa misy indraindray. Ny vola moa no fototry ny raharaha eto, nefa na ny zavatra atao, ny fitaovana ilaina sy izay ho enti-manana amin'izany dia tsapa fa : "ny vola tokoa no hozatry ny fiainana ". Tsorina anefa fa marobe ireo olona tsy an'asa, very noho ny hetraketraka tamin'ny taona 2009 nataon-dRajoelina sy ny forongony ohatra, ka lasa manao toetra tsy mendrika etsy sy eroa ny olona sasany, mangalatra, manolan-jaza, sns... ka tsy tombon-tsoa intsony fa "sitrany ahay " hatrany, izay hita koa amin'ireo mpamono olona sasany, satria mangalatra na mamono olona izy ireny, mba hazo finday fotsiny ihany ohatra. Mikorosy mikorosy hatrany ny fiainan-dRamalagasy.

Beharo

TONONKALO

Solombava very hasina ?

Angaha dia mahantra ianareo solombava No dia mitakizina akaiky mazava ? Mandohalika imason'ny mpanatanteraka, F'efa ny donto sy tena miveraka ?

Tsy aminareo ve ilay fahefana Ny handidy sy hanapaka izay ho lalana ? Sa voavidim-bola ianareo maro an'isa, Ka saribakolin'ny "mpanana" sisa ?

Ny mpanapitrisa no re fa mandidy, Ka indro ianareo fa tsy manan-tsafidy ? Dia manaiky lava sy manangan-tanana, Izay no porofon'ilay havendranana ?

Fitiavam-bola no tena mibahana Ka dia namidy ve ny fahafahana ? Eny amin'ny fotaka no mitsinkasina, Fa hay solombava efa toa very hasina ?

TSIMIMALO (13-04-23)